

肉

朱

筋

藏

江蘇古籍出版社

太常因革禮 二

太常因革禮
二

江蘇古籍出版



太常因革禮卷第四十

吉禮十二

享先農耕藉

有司攝事

享先農耕藉

太宗一

雍熙五年正月十七日

仁宗二

明道二年二月十二日

太宗雍熙五年正月十七日通禮爲中祀無告天告廟之儀是歲儀注升爲大祀詳定所奏按通禮藉田不載告廟儀今皇帝親行盛禮敦勸天下風俗欲差大臣前三日告

昊天上帝及告太廟禮儀使又言準光祿寺牒奏告用香
幣酒脯醢乞依郊例施行詔並可通禮不著先農后稷壇
通制度是歲儀注詳定所奏先農壇按通典北齊壇高九
尺廣輪三十六尺四陞三壝四門又按唐郊祀錄壇高五
尺周迴四十步今欲營壇高九尺周圍四十步其色飾以
青詔可又奏謹按通典隋籍田於國南啓夏門外十四里
郊祀錄唐祀先農長安在通化門外十里路陽在上東門
外七里道北切詳歷代籍田去京城遠近別無定制今之
東郊籍田里數遠近乞自勅裁詔遣官於朝陽門七里之
外至十五里之內取平地爲壇通禮不著籍田方位是
歲儀注詳定所奏按通典唐貞觀三年正月詔曰虞書云

平扶東作乘青輅推黛耜所以順春氣田於東郊也耕而
在東郊正其宜耳其方位伏請在東郊爲甚便詔可 通
禮陳設次設二王後西墻之內道南襲文宣公於文官三
品之下是歲儀注無此 通禮太樂令建路鼓於北架之
內是歲儀注易路鼓用雷鼓 是歲儀注設權火位於望
塵位之東北通禮無此 通禮設御耕籍位於外墻東門
之外十步道南向是歲儀注詳定所言按宋文帝元嘉二
十一年親耕籍田千畝中開阡陌御耕位在先農壇東北
按唐禮不立阡陌之制設御耕位在先農壇南十步詳此
蓋是當時壇前不設樂然而御耕位歷代亦無定制將來
籍田禮大備樂縣二舞俱在壇前今定御耕位在墻門東

南所貴便於行禮詔可 通禮有御耕位與三公諸王尚
書諸卿耕位無庶人耕位是歲儀注詳定所言按籍田舊
禮有庶人終畝之說即不載庶人耕位今欲於諸侯耕位
之南近東十步外西向設位以成終畝之禮詔可 通禮
御耒耜一具三公耒耜三具諸王尚書卿各三人合耒耜
九具已上耒耜太常各令籍田農人執之是歲儀注無此
通禮乘黃令進耒耜太僕卿受之載於御前之間是歲儀
注無此 通禮皇帝乘耕根車以耒耜載於車右是歲儀
注詳定所奏按通禮皇帝親載耒耜於車右又按隋書禮
儀志齊代籍田令御史乘馬車載耒耜於五輅之後以爲
禮輕遂以侍中奉耒耜載於象輅以隨木輅之後按舊禮

魏晉耕籍乘木輅今準通禮皇帝乘耕根車欲請以象輅
載耒耜列於仗內御前示重耕籍之禮詔可詳定所再言
據太僕寺狀稱耕根車一乘元無副車高下大小與玉輅
等駕青馬六疋駕士四十人並衣青綉大紬今詳酌帝王
所乘車輅皆合有副今車無副欲乞約南郊例止乘玉輅
駕以青馬駕士被青紬衣於禮誠使其根耕車欲請載御
耒耜陳於仗內御前示重耕禮詔可 是歲儀注駕出宮
大內留守於正陽門外奉辭所司又於京城門外設輶祭
如常儀通禮皆無此 通禮中祀不用犢是歲儀注詳定
所言按通禮先農中祀舊用一犢準初以羊豕代今來皇
帝親行籍事未審以何爲牲詔令用犢 通禮享日未明

二刻贊引引御史諸太祝詣壇東陞外行掃除於上令史祝史行掃除於下訖引降就位是歲儀注無掃除之儀通禮郊社令以祝冊進御書訖近臣奉出郊社令受各奠於案是歲儀注不行進書奠案之儀通禮皇帝不設觀耕臺位是歲儀注準詳定所言通典宋齊耕藉田於先農壇東別立觀耕臺帝親耕禮畢登此臺以觀公卿之推耕其臺元不載制度今詳酌觀耕臺自隋唐已來不置今檢詳故事伏乞增置觀耕臺以循舊禮雖然前代別無制度將來皇帝藉田觀耕伏緣被袞冕執圭其臺若高恐登陟不便伏請酌高五尺周圍四十步四出陞務在平坦便於行禮詔可是歲儀注詳定所又言皇帝藉田享先農亞

獻終獻準南郊例皆諸王充將來享畢未審只亞獻終獻
行耕禮其諸王皆預耕否詔諸王並令預耕通禮無此制
是歲儀注皇帝耕訖歸御耕位禮儀使跪奏請皇帝詣
觀耕臺俛伏興引皇帝樂作皇帝登臺南向坐樂止皇帝
觀公王已下耕公王等及應預耕者並須皇帝將就耕位
前禮生分引先就本耕位立皇帝登臺訖禮官請公王等
耕通禮無此制 通禮不著青箱種稂之制是歲儀注云
詳定所言按隋書籍田令帥其屬耕千畝以青箱奏種稂
之種跪呈司農詣耕所灑訖司農省功奏事畢唐朝即不
行此禮將來籍田行與不行繫之勅裁詔令備青箱奉種
稂之種禮儀使又言乞造青箱詳定所檢討元無制度請

下所司製造不用上蓋飾以青色內分九桶每桶設一種穀貴不相雜覆以青靶其制度繫有司雅飾詔可 通禮無行宮稱賀儀是歲儀注詳定所奏通禮籍田禮畢不載稱賀今詳籍田之禮久廢聖朝特展此儀將來禮畢文武百寮合詣行宮稱賀詔可 通禮中祀不進胙是歲儀注籍田祀先農用犢準例大祀詣閤門進胙伏緣先農本是中祀今檢詳郊祀錄五方上帝用犢皆以方色雜備者以純色代之今來詳定請以純色犢供應所有進胙伏請依南郊例施行詔可 通禮無肆赦儀是歲儀注詳定所奏謹按通禮籍田之禮不載御棲肆赦今詳舊禮雖不載肆赦之文又按通典唐開元二十三年籍田禮畢還宮大赦

將來禮畢御棲肆赦乞自初裁詔如南郊例肆赦其詳具
總例 通禮車駕還宮之明日設會於乾元殿如元會儀
是歲儀注有司上言唐禮勞酒在車駕還宮之明日今來
事遽日逼乞擇日大宴以成勞酒之禮詔可 通禮不命
五使是歲儀注禮院奏來年行籍田禮據開寶通禮不差
五使其南郊亦元無差五使之名近代相沿因而並命今
欲依郊例差五使尋命翰林學士宋白賈黃中蘇易簡同
詳定儀注以中書侍郎兼二部尚書平章事李昉爲籍田
大禮使開封尹陳王元僖爲橋道頓遞使翰林學士中書
舍人宋白爲禮儀使翰林學士司封郎中知制誥賈黃中
爲園簿使御史中丞張宏爲儀仗使

仁宗明道二年二月十三日是歲儀注詔內侍宋惟德修飾籍田先農壇如雍熙壇制高九尺周圍四十步其色青通禮設御座是歲儀注尚舍奉御置黃道褥位是歲儀注設幕殿於御耕位之北少西南向又設觀耕堂於御耕位之北又設幕屋於耕位之北少東南向其庶人耕位設於諸侯耕位之南又設太僕卿執御耕牛之位於牛之前又設籍田令及司農卿以青箱奉種粒種位於九卿諸侯之後通禮皆無此通禮王公九卿皆在耕位無助耕之文是歲儀注禮儀使言按雍熙詔書三公諸三助耕者各三人九卿諸侯各一人並絳衣介冑今以國公陪祀請從者各二人公卿如舊制詔可通禮神農氏后稷氏帝皆

以莞是歲儀注加以褥 通禮乘黃令進耕根車以齋殿
是歲儀注進玉輅於天安門外是歲儀注有司言乞依雍
熙年以耕根車載耒耜前玉輅以行詔可 通禮耒明一
刻侍中奏外辨質明皇帝服袞冕乘輿以出是歲儀注皇
帝服靴袍乘輿以出 通禮皇帝三推三公諸王五推尚
書六卿九推是歲儀注皇帝赴壇就耕位司農卿進耒以
授侍中侍中奉耒進御皇帝稽圭耒耒三推禮儀使張士
遜奏禮畢請授耒有司上曰朕既親耕不以古禮爲式願
推耕終畝用勸天下農民士遜復奏曰王者三推禮經舊
式皇慈敦勸度越古先請命公卿進耕以循契禮上曰朕
志在千畝蓋爲卿等固請遂耕十有二畦侍中前受耒耜

授於司農卿授廩犧令令復耒於縮以授侍耕者上升觀耕臺南向坐觀公侯等耕三公已下咸推盡壟而止悉過五推之數公侯退上還次司農少卿卒庶人耕於千畝是歲儀注三公諸王耕畢復位籍田令奉青箱種粒之種司農卿受而灑之耰訖耰覆種也並退復位通禮無此是歲儀

注云二月十一日行籍田三月十一日設勞酒宴於集英殿是歲儀注以門下侍郎吏部尚書平章事呂夷簡爲大禮使兵部尚書平章事張士遜爲禮儀使樞密使兼侍中張耒爲儀仗使樞密使兼山南東道節度使楊重勳爲鹵簿使樞密副使尚書左丞夏竦爲橋道頓遞使

有司攝事

通禮無壇壝之制禮閣新編淳化元年五月太常寺言先
農壇民有侵冒至內壝者切況壇壝之設神靈所依聖人
歲時致享之地謹按典禮壇制高五尺周圍四十步端供
初親耕藉田特詔設兩壝周圍無步數伏緣天地壇並設
三壝共先農壇爲細民妄有侵冒今欲四面各封五十步
爲兩壝壝各二十五步詔可禮閣新編淳化四年光祿寺
奏準指揮取大中小祀牲牢禮料之數切見立春祭先農
本只中祀而用大祀禮物切緣國家事天地祖考之神皆
有小大上下之祀苟先後瀆亂則人道無足觀者況欲降
格神明難矣乞下太常寺諸寺監立行改正尋準詔今後
先農之祀一依通禮祭饌施行 通禮不用後亥日 國

朝會要至道元年十二月太常禮院上言來年正月十日
上辛有事於南郊准畫曰其立春後亥日享先農伏緣先
農帝社之神不預南郊祀禮又緣與郊禮同日難更設祭
望依典禮改用次亥日詔可國朝會要景德四年十二月
都官員外郎同判太常禮院孫奭上言伏覩來年春季畫
曰正月一日享先農九日上辛祀昊天上帝耆按春秋傳
曰啓蟄而郊郊而後耕又禮記月令云天子乃以元日祈
穀於上帝乃擇元辰天子親載耒耜耕帝籍先儒皆云
元日謂上辛郊天也元辰謂郊後吉亥享先農而耕籍也
又六典及禮閣新儀皆言上辛祀天而後享先農國家增
修祀典敦勸農人須上長昌楹之時行平秩東作之政則

先後式序典禮無虧革正祀儀允屬明聖伏望改用來年
正月上辛後亥日享先農仍乞著爲甲令詔下太常寺與
崇文院檢討官詳定判太常寺李宗諤等言參詳唐制正
月上辛祈穀孟春亥日享先農不明載祈穀享先農前後
又按禮記正月令正月中氣天子乃以元日祈穀於上帝
乃擇元辰天子親載耒耜置之車右率公卿諸侯大夫躬
耕藉田注云祈穀謂上辛祀昊天上帝藉田謂郊後亥日
享先農於東郊而耕藉又按宋書後魏書所載並以上辛
後亥日祀先農伏請下有司自今享先農並用此日詔從
輿所議

太常因革禮卷第四十